

1 PETRO

Kukū Kasale Ko Di Petro

Lakpana Nii

¹ Ami, Petro, wɔ ninle ni Yesu Kristo tɔkyɛntɛ nikɔkpana kukū ko mmle nta aye batii ba di Yaa lediki nii, biɛsamii fɛ bafɔɔ bikpe ni di Ponto ku Galatia ku Kapadokia ku Asia ku Bitinia nsɔ suoto. ² Teete Yaa omu niediki ye di mmle okle di nnwɔɔ omu εετε ni kanya, ni Niinwuna Klekle lebla ye batii klekle ale biakyɔɔ Yesu Kristo atoko, ale aayɔ ntɔ nɔɔ anfoto ye suoto.

Yaa ale ye sibuale, aata atoko ɔkye ole disieko ye lɛɛrɔ kamɛ obe lele.

Bafūbanute Nkpe Osuku Onyu Wɔ Ninkpe Ni Nkpa.

³ Bita bupɛ Yaa sɛfa, dile ni Saate loo Yesu Kristo Ote. Diekye εεnya wo nyaami osie kanya εεta wo nkpa fole di obe wo εεsenkɛsa Yesu Kristo eekyeko ni bakpi kamɛ. Nle mmle nikotuo ale bukpe osuku onyu wɔ ninkpe ni nkpa nɛ.

⁴ Nioso buonyu osuku bulɛ bubawɛ dikusɛkuse kple le di Yaa lelolaa εεtɛ εεta ni batii nɔɔ di osi. Dikusɛkuse nwu nkpo kafɔɔ ninlalaa ee nintɔ ee ninfiele. ⁵ Aye ba niefū nwɔ bienu ni bɛɛyɔ Yaa osie beelolaa ye ale baata ye ni nkpa di dii yɛntɛle nwu nkpo suoto lele ninle dikusɛkuse nwu nkpo nɛ.

⁶ Binya suoto lɛyɔɔ di nle mmle suoto, kuntɛ di obe kakuii wɔ mmle kamɛ biɔnya dibuo ku

oso onyu ate ate. ⁷ Asaa ya mmle nimawa ye ni di suoto matuo mmle okle di ofū onu lee nle ni ɔnwaa. Bia koto sesele ko ninlalaan nii, ɔtɔ kamɛ manwa kū fie mantofo kū lele. Nioso ofū onu lee wɔ niefū ni kɔya kulenke ni koto sesele yi, dikpe ni bɛɛsɔ nwu beenyu fie babatofo ale ofū onu nwaa kule, fie di Yaa kamatansa ye, antakatesa ye katoo, ankpee ye dibu di dii le di Yesu Kristo makple anwa nii. ⁸ Diidii biinya Yesu, kafɔɔ mimbɔmbɔ nwɔ. Kunte bilɔɔnyɔɔ nununua wɔ mmle, biefū nwɔ bienu. Suoto լeyɔɔ kafɔɔ leyii ye kamɛ po manamafuo ni ɔyɔ ɔkaateessa ku lesalesaa. ⁹ Ta mmle okle biefū nwɔ bienu ni oso, Yaa mata ale minwɛ didiki.

¹⁰ Didiki le mmle oso di Yaa ɔlaa babuetete labuo di selaa kamɛ, baawolaa sī kamɛ klekle baabue baate mmle okle di Yaa male wo ni sibualɛ. ¹¹ Yaa ɔlaa babuetete nwu nkpo lakpee kɔnyaabe ale bootofo obe wɔ dibale ni ku mmle okle divate nii, di obe wɔ di Kristo Ninwuna latika ma ni di suoto, baatoobue baatɔɔte dibuo le okle nimawa ni di Kristo suoto ku suoto լeyɔɔ le abanya ni seseamaa. ¹² Yaa ladiki aatuo Yaa ɔlaa babuetete nwu nkpo ale ɔkpe nwu nkpo baatɔɔbla nii, diele mma oso baatɔɔbla nwu, kafɔɔ aye oso baatɔɔbla di obe wɔ baabue ni selaa se bitoonu biekyeko ni batɔkyɛntɛ nɔɔ ba niayie ni ɔlaa biene nwu lɛkya ku Ninwuna Klekle osie wɔ di Yaa lakyesee kuakye ni osi. Nle mmle nle asaa ya di Yaa batɔkyɛntɛ bia lamie ale boonu ni kasɔ fie.

Yaa Lelɛɛ Wo Ale Buasiɛ Nkpa Klekle.

¹³ Nioso bilolaa suoto bita ɔkpε ɔbla. Bieta anu lee ate kesekese, biesie bitoonyu osuku di dikusεkuse le di Yaa kamata ye ni di dii le di Yesu Kristo makple anwa ni. ¹⁴ Bikyɔɔ Yaa ɔlaa atoko, biedie nkpa kpile be kamε biasie ni di obe wɔ minayikyi bifū binu ni. ¹⁵ Kafɔɔ bite klekle di ɔsaabla lee biala kamε, fe mmle okle di Yaa wɔ nielεε ye ni nte ni klekle. ¹⁶ Diekye Yaa lebuε Kɔɔkpana Klekle Kukū kamε ale, “Bite klekle, diekye amii nte klekle.”

¹⁷ Nse biɔpε ɔlaa minta Yaa, minlεε nwɔ bile Teete. Binyuma kafɔɔ bile, nnwɔɔ ninkanko otii biala di asaa ya εεbla ni kanya, anannyu ni batii di anu. Nioso nkpa be niebu ye ni kaasɔ ka mmle suoto yi, bisie mi bitɔɔ ku dibu. ¹⁸ Diekye biye bile diele koto sεele ee kufututu ko ninwɔɔ ni di Yaa lata diisi lee aadiki ye di bawa lee nkpakuu be baasisie baabuko ye ni kame. ¹⁹ Kafɔɔ Kristo ntɔ be niefū ni kɔya aata. Nnwɔɔ niate fe Lefosobi le niasiekɔ ni di lessalesaa ditalala nwɔ ni di suoto ne. ²⁰ Yaa ladiki nwɔ aase lete kofokofoko fie biaaabla kayi. Ni aadiki nwɔ aatuo kayi di ayi yεntεle ya mmle kamε ta aye oso ne. ²¹ Dife ni di suoto nɔɔ ni biefū Yaa wɔ niatakatesɔɔ aakyeko ni bakpi kamε bienu ne. Ni εεtɔɔ kasiɛkɔ ka niɛtaka katoo kalenke ni ne. Mmle okle di ofū onu lee ku osuku onyu lee katika ni di Yaa suoto.

²² Di obe wɔ bitɔɔkyɔɔ ni nwaako ɔlaa nɔɔ nwu nkpo atoko, bitɔɔbla ni suoto klekle bitootuna bile biɔbɔmbɔ ni bafūbanute bamba, dikpe nii, biɛbɔmbɔ bawo di otu biene kamε. ²³ Diekye bitɔɔwe lelofo fɔle. Nkpa fɔle be mmle kafɔɔ

diekye lesaa le ninkpi ni kame, kafco diekye lesaa le ninankpi ni kame. Biewé lelofo fole le mmle di Yaa ɔlaa wɔ ninkpe ni nkpa kunaa ni kaloo kame. ²⁴ Fe mmle okle di Kokpana Klekle Kukū lebuε ni ale,

“Batii bamuu nte fe ofa.

Sele lema kafco nte fe atoto.

Ofa nwu nkpo nyoo, atoto nwu kafco nkpa.

²⁵ Kafco Yaa ɔlaa nwu, kunaa kaloo.”

ɔlaa wɔ mmle ninle ɔlaa biene wɔ lekya baayie baata ye ni ne.

2

Bafūbanute Ninle Yaa Batii Klekle.

¹ Nkpo oso bidie sikpile simuu ɔbla. Biedie selaa kuafunu, anu anu sesaabla, onumbεbεe ku batii ayooto ɔkpɔnɔnfɔsa. ² Fe mmle okle di babifcole mmiε ni nnyee ntu yi, bita Yaa ɔlaa nwu mananlo ni lesalesaa kuklee ye ɔkɔnsɔ osie kanya. Ale biamuɔ diidiki lee kame. ³ Diekye aye bamu bitoowolaa kame bietofo mmle okle di Saate sifutule nle nii.

⁴ Biwa Saate nfū. Diekye nnwɔɔ ninle difuɔ le ninkpe ni nkpa di kayi batii lesi ale diefū ni koya ne. Kafco nnwɔɔ ninle difuɔ le di Yaa lediki ale dile ni difuɔ le niefū ni koya ne. ⁵ Bite fe afuɔ ya ninkpe ni nkpa. Nkpo oso biyɔ suoto lee bitofo ninwuna olekatakɔ ka kame bibale ni olebatate ba nimayo ninwuna kame oleɔta assaa ya niesieko ni minta ni Yaa diefe ni di Yesu Kristo suoto. ⁶ Diekye Kokpana Klekle Kukū lebuε ale, “Lediki difuɔ le niefū ni koya,

nle mayɔ nse ni di Sion fe leyokɔ difuɔ,

otii lele niefū nwɔ eenu,
sinunsɔ dilabakpe nwɔ diidii.”

⁷ Difūɔ le mmle lefū kɔya osie kanya diɛta aye
ba niefū nwɔ bienu nii. Kafɔɔ mba ninanfū nwɔ
banu nii, dile,

“Difūɔ le di bayotofote lesī nii,
kafɔɔ dibakple difūɔ le nfɛ niefū kɔya
dilenke ni amuu.”

⁸ Kɔkpana Klekle Kukū lɛba bamba lekple diebuɛ
alɛ,

“Difūɔ le mmle mata batii ntuula,
difūɔkpaa le mmle nimata ma mannɔɔ ne.”

Baatuula, diekye baasī olaa nwu nkpo ofū onu.
Nkpo di Yaa lɛtɛ ale dibawa ma di suoto ne.

⁹ Kafɔɔ aye ninle batii ba di Yaa lediki ni
olebatate ba nintansa ni Yaa wɔ ninle ni ɔka,
ku batii klekle ba di Yaa lɛlɛɛ alɛ bale nwɔ ni
bale. Eediki ye eekyeko ditunu kame εɛwako
lɛkpa nɔɔ le niɛbla ni ɔkpe kame, alɛ biayie
ɔsaabla nɔɔ wɔ niɛbla ni ɔkpe lɛkya. ¹⁰ Di obe
wɔ nintabafe ni, bitale Yaa batii, kafɔɔ nunua
bitɔbakple nwɔ bale. Di obe wɔ nintabafe nii,
Yaa ditanya ye nyaami, kafɔɔ nunua, atɔɔnya ye
nyaami.

Bisie Nkpa Be Nimatansa Ni Yaa.

¹¹ Babiloo bɔmbɔtɛ, ote bite fe bafoɔ ku osuku
bakyente kaasɔ ka mmle suoto. Nioso kotikite ye
lekoto nle, biatoso suoto sina akɔnsɔkleesaa kpile
ya nikɔkpɛko ye ni obe lele. ¹² Bisie nkpa biene
di batii ba ninanfū banu ni kame ka bisi ni, alɛ
nse bia bɛɛkakate di suoto lee alɛ bakpileblate
bile yi, semaa, baanya ɔkpe biene wɔ biɛbla nii,
alɛ baatansa Yaa di Lɛkankoyi nwu nkpo suoto.

¹³ Ta Saate nwu nkpo oso yi, biwakosa suoto kasɔ̄ bita kale batunletɛ bamuu ku ɔ̄ka Kplɛ wɔ̄ di osie nsi di nnɛɛ kame dilenke ni. ¹⁴ Biwakosa suoto kasɔ̄ kafɔ̄ laakpanwu bita abaa banɔ̄fotii ba di ɔ̄ka Kplɛ nkpee ale baananfi ni asaa kpile bablate kootoko, antansa ni batii ba kafɔ̄ nimbla ni asaa di osuku kanya. ¹⁵ Diekye Yaa komie ale dibiene lee ɔ̄bla kata ale, babuute ba ninanye ni lesalesaa dilaawɛ ɔ̄laa kuonwii babue di suoto lee. ¹⁶ Bisie nkpa fɛ batii ba ninsiko ni suoto. Kafɔ̄ bitanta suoto osiɛko lee nwu nkpo lata ye osuku biabla okpile. Kafɔ̄ bisie nkpa fɛ Yaa bakpɛmblate. ¹⁷ Bibu batii bamuu. Biɛbɔ̄mbɔ̄ bafūbanute wo lee bamuu. Biɛyɛkɛ Yaa. Biebu kafɔ̄ ɔ̄ka Kplɛ.

Bitikanko Kristo Nnafukpaa.

¹⁸ Aye bakpɛmblate, biwakosa suoto kasɔ̄ bita basaate lee, biebu ma kafɔ̄ nwa. Diele basaate ba ninnya ye ni nyaami, mambɔ̄mbɔ̄ ye ni lete biabu, kafɔ̄ ku mba nimbla ye ni asi osie. ¹⁹ Diekye nse otii owo lekpee otu eefe diibuo le ninankaate ni baatii nnɛɛ kame ta Yaa oso yi, Yaa mawii nwɔ̄ 1eyɔ̄. ²⁰ Kafɔ̄ nse bɛɛnanfi fɔ̄ kootoko di okpile wɔ̄ feebla ni suoto, feekpe otu feefe kaamɛ, kamentansa ninsi kaamɛ? Kafɔ̄ nse feekpee otu diebuo fɔ̄ di lesaa biene ɔ̄bla kame yi, Yaa kamawii fɔ̄ 1eyɔ̄. ²¹ Nle mmle oso di Yaa 1elɛɛ ye ne. Diekye Kristo omu lafe diibuo kame aakpi diisi lee aadiɛ ɔ̄te onyu aatɛ ye ale biakyɛ di nnafukpaa nɔ̄ɔ suoto.

²² “Diidii atabla okpile kuonwii,
atalaa kafɔ̄ aata otii kuonwii.”

23 Batii latufa nwɔ, kafɔɔ, atatufa aakyisa. Obe wɔ baatootuo nwɔ ni dibuo, atafunaa kuonwii. Kafɔɔ aayɔ lesaa biala aata Yaa wɔ ninka, andiki ni lεbe ku lεrɔɔ.

24 Kristo omu niafū wo sikpile aatika di suoto, aasifiko kowoso suoto, aalaakpi. Aabla nle mmle ale buadie di sikpile kame munsie nkpa be ninte ni tinini diobuo ni Yaa anu. Ninnkɔ nɔɔ nwu nkpo kame kafɔɔ di Yaa lata ye lefabla. **25** Saa yi, biasie nkpa fe bafoso ba niayu ni osuku. Kafɔɔ nunua yi, Yaa ntookplesa ye εewako otii wɔ ninle ni batii kpate ku batii nyunte nfū.

3

Basa Ku Basɔfɔ Nkpa Be Baasie Ni Di Kristo Kame.

1 Aye basante kafɔɔ, dikpe nii biɛwakosa suoto kasɔ biɛta basa lee, ale nkpa lee biene osie kata ale nse bawo diikyi yi, baakyi manfū Yaa mannu. Ni dilabasinfī ale aye biabɛ kanya mintɔkɔ ma ɔlaa kuonwii, **2** diekye basa lee bamu manya mmle okle di nkpa biene lee nwu nle ni di suoto kasɔ ɔwakosa nwu kame. **3** Bitan-yɔ suoto sina akleesaa biatuo sekpeelee, fele asi ɔbla sikitii ku sika anyɛnɛ okpee ku abula ya niefū ni kɔya oklee. **4** Kafɔɔ bita sekpeelee dikye suoto omufū oklee ku nkpa buɛɛ osie kame. Sekpeelee se mmle ninlalaa diidii, diefū kɔya kafɔɔ osie kanya di Yaa anu. **5** Diekye saa, basanko klekle ba niayɔ suoto lɛma baata ni Yaa yi, baadiki sekpeelee lɛma baatuo di suoto kasɔ ɔwakosa ɔta basa lɛma. **6** Sara kafɔɔ labla nkpo, diekye aawakosa suoto kasɔ aata Abraham, ni aaleɛ nwɔ

ale, "Saate nii n.e." Nioso Sara babi sankobi nfə bile, nse biɛbla asaa di osuku kanya minanyekə lesalesaa.

⁷ Aye basuɔtɔ kafɔɔ, dikpe nii bieta lesɔnu lesie minko basɔfɔ lee ntɛɛ, diekye bale batii ba ninnaa ni ɔnyeɛ fɛ sele ye. Biyɔ dibu bita ma, diekye minko ma di Yaa labue aate ale abayɔ nkpa be ninnaa ni kaloo anta. Nse biɛbla nle mmle, biɛpɛ ɔlaa bieta Yaa yi, alabasĩ onu.

Bitan-yɔ Okpile Biata Okpile Koto.

⁸ Kayɛntɛ nii, bita bamuu lee disibu dibla ninwii. Bieta otii ɔlaa kukpɛ ye nyaami. Biɛbɔmbo bawo fɛ babilema. Biɛbla sifutule bita bawo. Biɛwakosa suoto kasɔ kafɔɔ bita bawo. ⁹ Bitan-yɔ okpile biata mba niɛbla ye ni okpile koto, ee biatufa mba nietufa ye nii biakyisa. Di nle mmle ɔbla kanya yi, bikaale dikusɛkuse bita ma. Diekye dikusɛkuse di Yaa labue aate ale abata ye di obe wɔ aalɛɛ ye nii. ¹⁰ Diekye Kɔkpana Klekle lebue ale,

"Otii lele nikomie ale asiɛ nkpa diɛmɛnɛmɛnɛ nwɔ,

oomie kafɔɔ ale suoto sitɔɔyɔɔ nwɔ di nkpa nɔɔ ayi kame yi,
ni atanta ɔlaa kpile kuonwii ladie nwɔ kaanya kame,

atanlaa selaa kuafunu kafɔɔ.

¹¹ Dikpe nii andiɛ sikpile ɔbla ambla dibiene, anwolaa atoko ɔkye ole, antikanko nwu ku otu nɔɔ omuu.

¹² Diekye Saate anu ntika di batii ba ninte ni tinini suoto, annu ma kafɔɔ lɛlɛɛ nse bɛɛlɛɛ nwɔ.
Kafɔɔ mba nimbla ni sikpile ankpreko ma."

¹³ Nse biekpee okyiini di lesaa biene ɔbla suoto, owe nimayila ye di suoto? ¹⁴ Kafɔɔ bia nse diebuo ye di lesaa biene ɔbla suoto yi, suoto լεյɔɔ dile dita ye. Bitanyɛke otii kuonwii, bitanta situ lee kafɔɔ latūkū. ¹⁵ Kafɔɔ di nle mmle kanya yi, biyɔ dibu bita Kristo fe Saate lee di situ lee kamɛ. Obe lele bilolaa suoto bilɛ biadiki otii lele niɛkaale ye ɔlaa kanya di osuku onyu wɔ ninkpe ni suoto. ¹⁶ Kafɔɔ bibla nle mmle di suoto ɔtɛ kaasɔ ku dibu. Bita situ lee se nintɔkɔ ye ni ɔlaa kamɛ sikpa, ale nse beetufa ye yi, sinunsɔ kakpɛ batii ba niebue səlaa kpile beekyeko ni nkpa biene be ninkpe ye ni suoto di onwii lee ɔbla ku Kristo. ¹⁷ Dile dilenke ale diabuo ye diibiene ɔbla suoto nse Yaa dibiesaa dile, ale diabuo ye di okpile ɔbla suoto. ¹⁸ Diekye Kristo kafɔɔ lakpi ninwii pɛ di batii sikpile disi di ayi amuu kanya. Nu aale otii wɔ niate ni tinini yi, aakpi di batii ba ninante ni tinini disi ale aafuo awo ku Yaa ntɛs ololaa. Baalo nwɔ di suoto sina kamɛ, kafɔɔ diafe ni di Yaa Ninwuna kamɛ, aakplesɔɔ aawako nkpa kamɛ. ¹⁹ Ninwuna kamɛ aakyɛ aalaayie Yaa ɔlaa nwu lɛkya aata anwuna ya baaseɛ baakpee ni baakpi kamɛ. ²⁰ Anwuna nwu nkpo ninle batii ba di Yaa lawɛ otu aata ni baasi nwɔ ni atoko ɔkyɔɔ di obe wɔ di Noa latoowlia ni oklo kplɛ nwu nkpo ne. Batii baseɛ ba niawo ni banɛ leti niawɛ didiki di ntu nwu nkpo ditayɔ nii. ²¹ Ntu nwu nkpo niayii nii nte fe Yaa ntu okpeesa wɔ nikodiki ye nii, diekye Yesu Kristo lataka aakyɛ di bakpi kamɛ. Diele ale kunusū ofoto di otii suoto dile, kafɔɔ ntam ɔka dile diɛta Yaa di otii otu biene kamɛ ale abatikanko nwɔ. ²² Nunua Kristo

ntoosifi osi asi di Yaa oletanεεkyε, oole sεka di Yaa batɔkyεntε ku situmi se ninkpe ni di osi ku basientε suoto.

4

Bisiε Nkpa Fε Bafūbanute.

¹ Nioso obe wɔ di Kristo lafe ni diibuo kame fε otii oso yi, ayee bita disibu nwu nkpo okle diwε ye fε nnwɔɔ, bieyɔ bikpee suoto osie. Diekye otii wɔ nikonu ni dibuo di suoto sina kame ninsimbla okpile. ² Nioso dieyɔ di nunua diesifi nii, dikpe nii biesie nkpa lee bule kaasɔ ka mmle suoto di Yaa dibiesaa suoto. Diesinle di batii akɔnsɔkleesaa suoto. ³ Saa yi, bialalaasa obe kpinwu biabla asaa ya baatii ba ninanfū banu ni mbla nii. Biakpi lερɔɔ di basiεwo kpile otikanko ku ɬεsɔnɔkppee ku battii akɔnsɔkleesaa kpile otikanko ku letansie ku ole pokyoa ku afio ɔtɔ wɔ ninankye ni di osuku kuonwii suoto. ⁴ Di obe wɔ minansimbla ni onwii ku mma bile biokple mintɔɔbla ni asaakuu nwu nkpo oso, diebla ma ɔkρε, nkpo oso bootufa ye ne. ⁵ Kafɔɔ bɔɔwa suoto kanya obadiki di Yaa wɔ nielolaa suoto abakanko ni batii nyu ku bakpi di asaa nwu nkpo ɔbla suoto. ⁶ Nkpo oso di Kristo labue ɔlaa biene nwu nkpo aata bakpi kafɔɔ ne. Nu di Yaa lakanko ma siitiinyu fε mmle okle ankanko ni batii bamuu, Kristo latɔko ma olaa biene nwu ale baasie nkpa di Ninwuna kame fε mmle okle di Yaa nsi nii.

*Dikpe Nii Bafūbanute Leblako Yaa Letasaa
ɔkρε Bεεkyakaako Bawo*

7 Asaa amuu kaloo ntɔɔtεεtεε. Nkpo oso bimufū suoto, bieta anu lee ate kesekese, mmle okle biafuo ni ɔlaa ɔtɔɔrε. **8** Lesaa le niefi dilenke ni ninle ale biabɔmbɔ bawo osie kanya. Diekye lεbɔmbɔ nta ale batii n-yɔ bawo lεma sikpile kpiniwu mankyε. **9** Nse onwii lee lebuo owo nɔɔ kɔfɔɔ yi, afū nwɔ, atankakate nwɔ di suoto. **10** Diekye obiala lee lefū lεtasaa finle lewo eekyeko Yaa nfū. Nioso fe basaanyunte biene yi, biyɔ atasaa lee nwu nkpo bikyakaako bawo. **11** Otii lele ninyie ɔlaa biene nwu lεkya yi, ayie nwu fe mmle okle di Yaa lekpee nwɔ ni. Otii lele kafɔɔ ninkyakaako batii yi, ayc osie wɔ di Yaa lεtɔɔ ni akyakaako ma, ale baatansa Yaa lεssaa biala kamε diefe ni di Yesu Kristo suoto. Nnwɔɔ lele ninle katansa ku osie dinaa ni kaloo. Diwa kaanya.

Bibanya Dibuo Fe Kristo Lele Okle.

12 Babiloo bɔmbɔtε, bitanta diabla ye ɔkpε di abuo ya kple biɔnya ni suoto di ɔsɔ onyu kamε. Bitanta diate ye fεle lesaa le minoonyu osuku bita ni nikɔwa ye di suoto. **13** Kafɔɔ bita suoto siyɔɔ ye ale aye kafɔɔ biɔnya dibuo fe Kristo okle. Diekye suoto kamayɔɔ ye mimpɔ osie kanya di obe wɔ abakple anwa ni di lεkpa nɔɔ nwu nkpo kamε. **14** Bita suoto siyɔɔ ye nse batii letufa ye ta bile ni Kristo batikankote oso. Diekye Ninwuna kpale le, ninle ni Yaa Ninwuna ntika ye di suoto. **15** Bitanta kuonwii kaamε lee lanya dibuo fe batii lotε ee yu ee saalalaasate ee kubue kpeetε. **16** Kafɔɔ nse onwii kaamε lee kɔnya dibuo ta ale ni Kristo ole oso yi, atanta sinunsɔ lakpε nwɔ, kafɔɔ apε Yaa

səfa ale Kristo leyooto ntika nwɔ di suoto. ¹⁷ Obe ntoowo ale Yaa kakye lækanko kasɔ, batii nɔɔ bamu kafɔɔ ninle batii kasale ba abakanko nii. Ni nse abakye lækanko nwu kasɔ kaame loo, ni be nimawa di batii ba ninanfū ɔlaa biene nɔɔ nwu nkpo banu ni suoto? ¹⁸ Kɔkpana Klekle Kukū lebue ale,

“Nse dibawɛ osie fiɛ baatii biene kamawɛ didiki
mɔ,
ni le dibate ninta batii ba ninanyɛkɛ ni Yaa
ku bakpileblate?”

¹⁹ Nkpo oso, batii ba nikɔnya ni dibuo ta Yaa dibiesaa dile dita ma ni yi, batɔɔbla lesaa biene, baayɔ suoto lɛma bakpee di blate lɛma nnɛɛ kamɛ, nwɔ nimbla ni di ɔlaa nɔɔ suoto obe lele.

5

Bitoonyu Yaa Babi.

¹ Nunua ami fe bafūbanutɛ tunletɛ yi, kɔka aye ba ninle ni batunletɛ di bafūbanutɛ dikudi nwu nkpo kamɛ. Ami omu lanya mmle okle di Kristo lanya ni dibuo. Nse eekple εɛwa yi, kamawɛ kalekɔ di lekpa nɔɔ nwu nkpo kamɛ. Kotikiti ye lekoto nlɛ, ² bilolaa Yaa batii ba εεyɔ eekpee ye ni ninnɛɛ kamɛ binyu nwaa fe mmle okle di baafosokpate nnyu ni bafoso nɔɔ. Bitanta diabla fe onyinka boonyinka ye, kafɔɔ bibla ɔkpe nwu ku otu biene. Diekye nkpo okle di Yaa komiɛ ankyeko ɔkyɛ lee nɛ. Bitan-yɔ ɔkpe nwu nkpo biabla fɛle lesaawɛ lee kamiɛkɔ, kafɔɔ bidiki kafutu lee kamɛ bibla nwu. ³ Bitambla bile birole sesaate di batii ba di Yaa ɛeyɔ eekpee ye ni ninnɛɛ kamɛ, kafɔɔ bile ɔtɛ onyu bita ma di nkpa lee

disiebi kamε. ⁴ Alε nse bafosokpate nɔɔfo nwu ninle ni Kristo lebawa yi, abata ye lekakoto le nikɔkpɑ ni, ninanfiele nii.

⁵ Nkpo okle kafɔɔ dikpe nii aye bakosopo biɛwakosa suoto kasɔ bieta bafūbanute batunletε ne. Bamuu lee biwokosa suoto kasɔ bita bawo. Diekye Kokpana Klekle Kukū lebue ale, “Yaa kotii batii ba nintakatesa ni suoto katoo osuku.

Kafɔɔ anle batii ba niɛwakosa ni suoto kasɔ sibuale.”

⁶ Nkpo oso biwakosa suoto kasɔ di Yaa kɔnεε siene kalɔ, ale aatakatesa ye katoo di nnwɔɔ omu nɔɔ obe biene kamε. ⁷ Biyɔ ahaa le amuu bikpee di Yaa nnεε kamε, diekye obe lele oobu ye disi.

⁸ Bimufū suoto bieta anu lee ate kesekese! Diekye kyidite lee Abonsam kokyi katoo ku kala, fe kyata wɔ nikokumii nii, oomie otii wɔ aamufū anwee nii. ⁹ Biwε osie di ofū onu lee kame bietii nwɔ osuku, diekye biye bile bafūbanute wo lee kaayi ka mmle kamuu kame kofe di abuo ya mmle okle kamε.

¹⁰ Kafɔɔ nse ditoobuo ye di obe kakui semaa, Yaa wɔ ninkpe ni sifutule, εεlεε ye ale biawa mimawε ni kalekɔ di lækpa nɔɔ le ninnaa ni kaloo, diefe ni di onwii lee ɔbla di Kristo kame mabla ye minwo, anse ye sidu, ankpee ye osie, anse ye di lɛsɔse nwaa suoto. ¹¹ Osie omuu ninle nwɔ ole dinaa ni kaloo. Diwa kaanya.

Kɔsεεsa Ye.

¹² Obiloo Silvano wɔ ninle ni kpemblatεwo nii biene niɛkyakaakoe lækpana ye kukū ko mmle kakui. Kokpana kū nkpee ye osie ntɔkɔ ye kafɔɔ

nle nwaako, Yaa sibualε simu ninle nse mmle nε.
Bimufū nwu biklee osie kanya.

¹³ Bafūbanute wo lee ba di Yaa lediki ni di
Babilon kasɔ suoto kɔsεesa ye. Nkpo okle kafɔ
di obi nii Marko kafɔ ale ɔɔsεesa ye biene biene
nε. ¹⁴ Bisεesa bawo ku atuu ɔbla di Yaa lεbɔmbε
kamε.

Atoko ɔkyε ole disiεko bamuu lee ba niεbla ni
onwii ku Kristo.

Yaa Kanya Ninii Fole Selεε

Selεε: Yaa Kanya Ninii Fole Selεε New Testament

copyright © 2008 Wycliffe Bible Translators, Inc.

Language: (Selεε)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Feb 2024 from source files dated 29 Jan 2022

b86b27c9-33ee-5380-a452-244df2dc60c6